

密乃可納之於四鏡高二尺以馬通若煉火於下燒之初火之日令火丰四鏡之脚至十二日可又進之令去土釜五寸又至十二日令火去釜下二寸復至二十四日可進火齊釜下又至二十四日復引火下釜之半腹二十四日以火平下釜之上又至二十八日止可又清之三日徐徐開之藥當精華仰著文光寶輝慶雲之色即以鷄羽掃之藏於金銀之器懸之暗室則朱光見焉以本命之日清水服一七上則壽同晨極役使鬼神真人來降玉女奉侍致天上之廚役使華晨之龍於是騰空躍虛上造紫房位至真極命曰无上仙王

又以此丹九兩納於青竹筒薄削其表以白蠟密固其口藏之於北極之下令深三尺畢又平至三十二日當化成水命曰紫藥之腹又以瓊液和上清九靈之玄水三斗則以新器藏之以白蠟封其口至二十一日成丹藥九符之玄水玄水成開之上生靈華五色之煙又以九符玄水一合陰丹一匕向太陽再

拜服之立登仙矣

又亦可陰丹三兩分為十二分清水服之十二日亦白日昇晨上土服丹可不須此玄水又但單服九符玄水一合百日則神仙无極慶雲見而真人至若人有病者但以口噓之立愈若欲呼召鬼神致天廚者可閉氣而存之則所命立至

又死已三日者以陰丹如黍米者合水灌其口立生矣十三日比語并一丸塗其心即活矣若藥精未發者可更封其際復十五日更火之日使平釜下至十五日可引火至下釜上至二十一日止凡五十日也復清之三日開之如初萬无不成

清虛真人曰至道要妙在其中吾神列輝還四宮陰丹十二亦為雄太陽通霞伏朱光清靈上士造玉堂中士服之昇玄房憑人下士半天翔須得九符之華剛妙哉妙哉為仙王故設此語昇天倉

太清金液神氣經卷上

太清金液神氣經卷中

黃帝曰人皇者皆知死生之錄識百鬼之名記萬神姓字求延年益壽法當跪人皇一通書已姓名年月日歲州郡縣鄉里亭社因祖葬之時便內此疏塚中祝曰生則有死命錄所當某甲不錄大幽藏今已安萬里冥冥遊長悲哭之訖乃還更當易姓字不得與前也於是千秋萬歲不復死矣錄籍已定死名長減不能作此法者但可跪著塚中終身不病宜子孫縣官盜賊謀議已者還彼身中說已者斷舌口噤追已者足折視已者目盲此法書著繪上依法修之也

天神姓名字秘文

天者太一所生太一名務猶收字歸會昌知之者長生不死夕存之也天公一號天父姓皇字湯君日姓張名表字長史月姓文名甲字子先七星姓張名列字世容雷公姓果字君吾東王公姓无為字君解西王母姓自然字君思一字文珠

右八神男知之者不兵傷女能憶識不乳

110181A 1337 0

死

東方句芒君南方祝融君西方蓐收君北方
玄冥君中央軒轅君

右五神常呼之令不病病者呼之保不死
死而呼之必復生

東方青帝姓產名並字慎遷南方赤帝姓溫
名業字使卿西方白帝姓趙名鍾字元照北
方黑帝姓葛名賢字秋都中央黃帝姓陽名
次字元都

右五帝姓名字知之百鬼為却在冢者持
名置堂中央亦可書素符之禁前大吉上
件出天皇文第一卷

地神姓名字秘文

后土姓冥名薰大山姓馮天名崑嵩字金員
小山姓崇名定字巨勳東嶽姓辰名蒙君南
嶽姓榮名營君西嶽姓華名靈君北嶽姓荒
名卷君中嶽姓憚名樊君

右土地山嶽姓名字知之行來入山風雨
不迷所向通利禍散災消善願成遂
東海姓何名歸居君南海姓劉名詔君西海

姓裏名漱君北海姓吳名馬強君河伯姓馮
夷字君平

右五水神知者長生久視周旋八極往還
十方不畏風波不憂飢渴過度三災九厄
常保元亨利貞教化廣被一切歡樂元極

一豫州社姓范名施二雍州社姓修名理三
梁州社姓黃名宗四荊州社姓張名豫五揚
州社姓鄒名昆六徐州社姓韓名季七青州
社姓殷名育八兗州社姓賈名明九冀州社
姓馮名遷稷姓戴名高

右九州上應九天九皇之根九宮所在堯
時大水分為十二夏禹復為九州漢武帝
分豫立司十有三州多歷年所後漢以來
分立稍多神明所領九州為常能憶九州
之社一天之稷呼其姓名問其是非皆白
兆吉凶可役而使之賞善罰惡救濟蒼生
也

凡欲致萬神求昇仙皆先潔齋清已香水灌
頭沐浴五香蓋淨身體也百日之後乃可致
神明欲求仙者當從北嶽西嶽中嶽真人求

靈飛散得而服之必得神仙矣真人曰凡欲
學仙不老長生久視自髮更黑齒落更生面
目悅澤肌肉有光從表觀裏者當服靈飛散
老子曰此方術之要神仙之道必化之本道
士服之神仙不難術士服之飛遊華山凡災
服之年去復還老公服之反生童顏
老子曰服此藥者可以不老十日服之三年
不食服之三年可壽二千六百二十四歲我
非一人皆得真道保成神仙

靈飛散方

雲母一斤成鍊者茯苓半斤亦可一斤栢子
仁七兩續斷草七兩石鐘乳七兩菊花五兩
亦可十五兩木四兩乾地黃十三兩桂七兩
凡丸物治下篩訖以天門冬一十斤咬咀絞
取汁以丸此藥汁多和之汁少者澆之著銅
器中懸著甑下蒸黍米一斛二斗下熱出藥
曝乾更治令細篩服一方寸匕旦服無毒可
多服耳當食十日身輕二十日耳目聰明七
十日頭髮白返黑故齒皆去若落去者取藥
二十七以白蜜和之持二百下止丸如梧

子可得八十一丸曝令燥訖視凡表裏相見如明月珠或似螢火精珠或赤或白此仙人隨身常所服藥也欲令頭髮時生者日服七丸至髮生不白不落若入深山不食亦可作此丸日服七丸不飢也若頭髮不落未白但可服散壽六百年不白耳白者如前法已白服藥可至一百一十七年乃落耳求道必仙要至神仙髮齒更生如三十時求道服藥髮不白齒不落老而服之得仙之要齒骨尸解道之下者凡作此靈飛散服之三日力倍五日血脈盛七日身輕十日面目悅澤智慧聰明十五日力作不知極徐行及馬二十日不可復當三十五日夜視有光

治雲母粉法

白鹽一斤和合雲母一斤并搗之雲母藥勿篩納重布囊中按搥之水汰鹽味盡納絹囊中懸令乾即成粉一法以鹽湯煮之盡解如泥狀搥之為粉又法雲母一斤大鹽一斤漬之銅器中三四蒸之一日於臼中搗之為粉

又法用朴硝水三斗水煮法雲母一斤取盛粉燥舒之向日光看无芒便好有芒勿服服之久後病殺人宜精治之也

漆丹法

漆三斗亦可二斗淳不澆者丹砂一斤色如雄雞冠无鷹雜者二物下細篩淳大醋三斗和合相得著銅器中火上微煮之三日三夜向欲成時當如水克欲熟如油澤以銅器著地須更凝可丸服如小豆二丸清玄水進之不堪玄水者可咽液吞之勿雜食三十日病愈三尸去百日肌堅骨強千日司命削死籍與天地相保日月相望改形易體日中无影天地運改唯我常在遊宴三清為種姓之宗

未央丸方

雲母二斤松脂四斤水銀三兩天門冬一斤亦可二兩凡四物咬咀納著大竹筒中復以大竹筒例沓之令得強下下訖復以麻約其筒三上塞其口勿令泄蒸之十斛末下若不能一頓炊之耳訖出筒不須出藥筒著戶上

裏面二十一日內氣出為陰外氣入為陽二氣足藥乃成更出治之五百下若藥燥者可以蜜和之常以成日西北向服之如大豆二丸却五十日復服二丸復五十日復服二丸自此之後二百歲復服二丸却千九百歲復服二丸若鬢髮變白者服四丸即不白矣自此之後可不服也若力氣弱者為五六千歲後可復服一丸當絕房室斷陰陽若欲昇天見玉女者服七丸訖以申日加申時西南向日閉氣六十息訖惠瞑目向日復二十息目中當見青紫色者從額上摩來入口中四摩之訖乃閉口空咽滿百七十咽乃暮服一丸却十日到申日復如前法訖祝曰天道無期我已得之人道雖短我與之友已受天命必得長生上呼玉女足躡魁罡應氣十二身佩三光與乾相保出觀萬方急急如律令祝畢當有玉女來迎之雲華羽翼接地昇天也

太清金液神氣經卷中